

摘藻堂四庫全書薈要

集部

欽定四庫全書叢要

集部

漢魏六朝百三家集卷八十二下

詳校官候選知縣臣吳甸華

欽定四庫全書醫要卷一萬九千六百七十三

集部

漢魏六朝百三家集卷八十二下

明 張溥 輯

梁簡文帝集 二

論

勸醫論

勸醫曰天地之中惟人最靈人之所重莫過於命雖脩短有分夭壽懸天然而寒暑反常嗜欲乖節故瘧寒疝

暑致斃不同伐性爛腸摧年匪一拯斯之要實在良方  
故祇域醫王明於釋典如大師乃以醫王為號以如來  
能煩惱病祇能治四大乖為故亦有騷人之詠彭城秦  
國之稱和緩季梁之遇盧氏號子之值越人爰至久視  
飛仙長生妙道猶變六一於金液改三七於銀丸蓄玉  
匣之秘研紫書之奧桃膠何是北斗靡遜其形金漿非  
遠明珠還恥其價能使業門之下鼓響獨傳雍祀之傍  
簫聲猶在周禮疾醫掌萬民之疾凡民之有病者分而

治之歲終則各書其所治而入於醫師知其愈與不愈  
以為後法之戒也正如研精玄理考覈儒宗盡日清談  
終夜講習始學則負墟尚諛積功則為師乃著日就月  
將方稱碩學專經之後猶須劇談網羅愈廣鈎深理見  
厭飫不寤惟日不足又若為詩則多須見意或古或今  
或雅或俗皆須寓目詳其去取然後麗辭方吐逸韻乃  
生豈有秉筆不訊而能善詩塞兌不談而能善義揚子  
雲言讀賦千首則能為賦況醫之為道九部之訖甚精

百藥之品難究察色辨聲其功甚秘秋辛夏苦幾微難

識而比之術者未嘗稽合會無討論多以少壯之時涉

獵方疏畧知甘草為甜桂心為辣便是宴馭自足經方

泯棄同庾散之讀莊子異孔丘之好周易然而疾者求

我又不能盡意攻治假使不能為地自可即為已益所

以然者若無隔貴賤精加消息以前驗後自可解之日

知所亡坐成妙術而又告以不能也治疾者衆必以孟

浪酬塞悞人者多愛人者鮮是則日處百方月為千軸

未嘗不輕其藥性任其死生浮華之功於何而得及其  
愛深親屬情切支肌患起膏肓痾興府俞雖欲盡其治  
功思無所出何以故然本不素習卒難改變故也胡麻  
鹿藿纔救頭痛之痾麥麴芻藟反止河魚之疾思不出  
位事局轅下欲求反死者於玄都揚已名於綠帙其可  
得乎術道困窮於斯實至誠當善思此意更興其美非  
直傳名於後亦是功德甚深比夫脫一鴿於權衡活萬  
魚於池水不可同日而論焉

彈棊論

觀夫模穹蒼而挺質寫博厚而成形峙五岳而標竒停  
四海而為量協日月之數應律呂之期總玄黃之武畧  
校孫吳之應變語其用心壯哉之戲也爾乃觀壯士之  
出師望兵戎之式道上昇則搏翼穹天赴下則建瓴高  
屋乘危則棧山航海歷險則束馬懸車完五憶霸國之  
勲全六想陳平之智八反均高陽之數四角思漢后之  
歌飛瓦同晉侯之琴徘徊異鄴中之輦牽牛覺乘槎之

來織女擬雲駢之去故古人或言之禮樂或比之仁讓  
或喻以脩身或齊諸道德良有以也

七

七勵

藏名外臣體道好異遁跡埋影剗心人事任性於蓼水  
之側放心於自得之場情苞六合德貫九方巖棲谷餘  
絕際濠梁於是寂鏡公子聞而往說乃飛車翠蓋翔駕  
絳螭丹旌風轉碧幔雪移映玉軼之綺靡照銀車之陸

離經九嶠之曼阻歷五曲之巔危路入閭風道經通谷  
橋塗泱泱路林蕭肅石磴穹窿松關重複羊腸望斷遂  
路迂餘攀林稅駕乃遇藏名之所居其居則蘚苔沒砌  
幄葉斜林千峯沓頂萬仞懸深南危碧流北障芳林左  
縈重陸右背高岑烟霞罩日石澗籠陰聲諧百籟響弄  
千禽寂鏡公子曰蓋聞智者不懷道沒志遺俗埋名迷  
邦碎寶却粒辭榮今欲說子以默語之術寧欲聞乎藏  
名曰僕雖幽栖遠紆名德寧忘潔己以受至言

公子曰夫怡情託體實寄閑宮跨危樓於插漢挂日景  
於迎風玩靈華於仙掌度窈窕於飛虹金枝照曜玉壁  
玲瓏文窗洞右飛閣陵東桂柱通光雄梁亘日璧鏡鈕  
懸抽荷并出中宿綿延長廊周密青錢碧影金犀玉律  
冬閨溫煦夏室含霜圖以珍怪畫以禎祥瓊茅秋藹綠  
蕙春香植宜男於粉閣樹君子於椒房迴風烟於璇題  
垂珠璣於玉箱文魚水宿錦鳥雲翔乃登陟遊踐望遠  
通疎擢素藕於石鏡塞蔓草於康衢若荆山之琢玉似

隨水之弄珠若斯官之閑麗子能與我而共居外臣曰  
僕遊心蓬葦未暇斯處

公子曰夫靚妝嚴服託體必嘉五絲擅美獨蠶稱華組  
帷粲綵緹服含葩丹墀聚葉縷檻飛花至如稷下縫掖  
泗上章甫雉緝霜鮮秦絲園縷鳳色龍分鴛文鵠聚瑤  
紛瑤席綺飾瓊珮齊都滑石南海璫瑁散似綴珠離如  
並績蜘蛛弄巧越女調樞夏則桃笙竹席冬則青莞金  
鬚溫麗瓊臺密華承寢當戶之穀大文之錦華蒲萄之

綺衾麗芬若之丹枕金蘇翠幄玉案象牀子能從我樂  
此芬芳外臣曰帶索披裘自得山性雕章麗服未敢攸  
同

公子曰五飪調神三芝輔性用康仁壽以弘貞正乃使  
有莘之徒調嘗鼎味九州珍雜八方豐貴名廉天地之  
聲穀竭山海之味蟬鳴秋稻鸞領玉精離紅之膾勺藥  
之羹蒙山擅重灌水傳聲桂蠹石瓊龍胎鳳肺四膳八  
珍五肉七菜累似穀雜切均鮮繪色若紫蘭紛如紅綵

若乃越梅變實楚醴方添陳晨鳧之美味薦雋鷺之肥  
甜洗以三危之露水調以大夏之香鹽霜薤沸烈露葵  
繁舒芳菰之菜白霜之茹澄瓊漿之素色雜金筍之甘  
菹素醪浮氣鄴醪凝清獻三爵之踰雅等千日之芳醴  
酌玉斗之英麗照銀杯之輕蟻此亦天下之美味子能  
從我而享之乎外臣曰藜藿可膳薇蕨堪食五味口爽  
寧假玉盤

公子曰若夫釣臺之樂葛天之歌飛七盤之妙節動六

變之清和綠綺麗琴丹山寶瑟鏤器倕雕孤枝伶律奏  
白雪之楚緩陳亭蓆之吳疾躍鳥追飛潛魚伴出將使  
漸離擊筑雍門鼓琴鳴繞梁之妙響發愁眉之清音至  
如五陵金穴六郡豪家表流歌於東夏出秘舞於京華  
金鈿設翠步搖藏花遙同暮雨逼似朝霞髮鬢如點纖  
腰成削玉齒笑容紅妝綽約疾趨巧步霧袖芬披舒蛾  
眉之窈窕委弱骨之逶迤載金翠之婉嬋珥瑤璫之陸  
離芬芳於梧春之苑灼爍於長州之中于時斜光西委

薄霧舒紅隋珠照影羅衣從風觀者方堤覩者盈淇令  
二鷺之綴翼使八鶴之增悲明君為之斂泣西施為之  
解眉於是蘭閨寂晚曲韻相和對輕風之落景望明月  
以清歌歌曰酣醕半兮樂既陳長歌促節綺羅人拂鏡  
弄影情未極迴簪轉笑思自親此亦聲音之盡妙子能  
從我而聽之乎外臣曰淫聲亂耳未足入聽方追山壑  
永弄林泉

公子曰夫心遊百氏理奧六經樞機性道陰陽窅冥昭

玉牒於年史覽石記而照情若夫鄒枚上客揚馬俊人  
揮金入趙易服歸秦賣舌彈劍買義追仁商榷萬古弋  
釣陶甄池中水黑席上稱珍判二氣之氛氲辨六爻之  
終始鳥變龍工鳳書雲紀辭宏八索辨崇三耳至如范  
睢折脇豫讓拉齒禮竭中心報深國士碎玉爭城藏圖  
解劍見碣石之金堤望楚都之揚塹美陳平之反間揖  
子房之智謀想秦君之傳器仁漢后之解裘此亦天下  
之奧籍得性之林圃子能同覽悅目以齊此心外臣於

是色動清顏頰解高意曰僕雖野陋頗悅帶經但負薪多疾未甘斯說

公子曰夫氛氳構象純雜不同共工折柱雖播英風自古而然曾何足道但吹沙役寇抑自羲年吐霧藏妖聞之堯日至於今者昌運天啓握歷寶年風猷駕層漢道德漏重泉至如玄蹄外境紫舌頑人悖而無禮不沫皇仁於是騰三泉之宵漫載五旗之飄揚引玉車於西隴鳴金鼓於北邙拭龍泉之雄劍瑩魏國之寶刀銘踰巨

闕利擬豪曹至如牽鈎壯氣斗膽豪心緣腰白玉帶珮  
黃金酬恩報死尅遠長岑騷裹白鷺耀躍青離五玉察  
善十相無遺連腰錦帶半足塵飛標威於鴈門之境振  
旅於龍突之鄉若乃驚沙絕岸苦霧綿長秋河曉碧落  
蕙山黃紅顏素改玄鬢斑霜征夫抵掌而飲膳壯士憤  
氣而沸腸迴雲鳥之密陣背却月而相望旗纒轉而漂  
杵鋒未至而驂傷前鋒紛其易幟後騎決其沙囊何湯  
雪之能比豈拾塵之可方於是呼韓頊頽龜茲銜壁羊

牽既袒熊山已積九截同文八極齊軌帝曰念功班茅  
賜履青紫如拾賞歸詔美此亦天下之壯績子能從我  
而效之乎外臣曰葛伯不祀雖聞湯誥野叟力弱未敢  
振衣

公子曰堯舜垂拱煥彼前聞今惟聖歷萬代一君壁儀  
照氣玉井珠分德合天地道方華勲滄海碧徹黃河一作

流黛文愛人育德澤等春雲一作宣尼茂典周姬禮容

黃裳進士清襟俊童邦知改俗國化移風賣藥無藏名

之老河泗無洗耳之翁德星夜映慶雲晝色異草雙條  
靈禽比翼狐尾既九茅脊復三金船漾寶銀甕呈甘康  
歌壤笑悅禮樞談隆周謝德盛漢知慙慈照無礙化湛  
靈覺散漓弘淳拯澆敦朴國被仁壽家欣教學三明鑒  
道六度弘風出塵照苦入冥觀空善識無盡因性必通  
天不愛寶地無隱瑞百神受職三苗奉義石策紫泥繩  
金玉刺或託諷梁甫權卧德而龍盤或織箔渭濱恥藏  
名而鳳跂於是露點飴蜜溜泓澄於玉掌雲垂五采覆

旖旎於仙樓漾醴泉於浪井拂垂楊於御溝或聯七葉  
一姓五侯外臣於是觀色內動神貌外移忽正山巾而  
言曰蓋聞幽居獨善見譏往聖儻不遺矇叟亦願順來  
命

頌

大法頌

有序

皇帝以湛然法身不捨本誓神力示現降應茲上龍顏  
日角參漏重瞳衡表連珠文為玉斗自納麓開基天地

之德已布封唐啓跡日月之照先明百揆之序方舜九  
河之導均禹尚弘事殷之禮且屈在田之則自五昴朝  
飛告赤文之瑞其雨七日受綠色之符神器有歸鼎運  
斯集焦門厭棄德之君鮪水發白旄之陣然後受皇天  
之睠命當四海之樂推豈假祀蚩尤於沛庭託河冰於  
王霸於時鳳凰裂序蒼蒼舛度乃選五石以補之坤軸  
傾斜積水發圻乃緯九藪而正之陰兔兩重陽鳥三足  
乃定王業以暉之攝提乖方孟陬失紀乃置清臺而辨

之維冠冕於已頽綴珩珮於既毀自憑玉几握天鏡履  
璿璣而端拱居巖廊而淵默於今三十有二載也是以  
天德一於上地數二於下復朗參辰不易日月兩曜如  
合璧五精如連珠禋宗類昊虔丘禮澤敬行五祀功被  
百神川嶽呈祥風烟効祉青雲干呂黃氣出翼聽隄山  
之威鳳製大夏之貞筠陽管叶春雌鍾應律上林之課  
匪疎相府之占無謬奏六英於若水張咸池於洞庭秉  
翟動和天之樂建華宣異俗之奏協律有渢渢之序典

樂致雍雍之節詩書乃陳縑縹斯備蒲輪受伏生之誦  
科斗薦魯宅之文蒸粟殺青玉牒石記填委廣內暉煥  
麒麟置台命袞法河依嶽建職樹司區雲祥火高山容  
與赤黻邈迤色麗文翬章研織鳥諫鼓高懸芻言不棄  
肺石通惋書謗橋板草名指佞便辟去朝獸稱觸罪姦  
回放黜是以龍翔鳳集河濞海夷露下若飴泉浮如醴  
桂薪不斧而丹甑自熟玉臯詎率而銀甕斯滿河光似  
翳樹彩成車氛氲四照暉麗五色神明磊砢徵祥布護

金鱗鐵面貢碧砮之睨航海梯山奉白環之使戴日戴  
斗靡不來王太平太蒙無思不服方叔邵虎之臣均擊  
應鼓之將秉龍虎之秘韜握朱玄之異畧受賑於廟堂  
之上揚威於關塞之下出玉門而直指度金城而奏策  
蕩雜種之殘妖匡中原之塗炭北臨地脈西出天渠昆  
夷罷患夙沙自服獲犬戎之鹿懸密須之鼓藁街有受  
纓之虜詔水觀受降之首四表無塵六合共貫皇德隆  
矣太平之風浹乎無外矣天子內韜無生之至慧外應

體乾之弘跡將欲改權教示實道遣方便之說導化城  
之迷乃端宸神居吁而言曰若夫眇夢華胥怡然姑射  
服齊宮於元扈想至治於汾陽輕九鼎於褰裳視萬乘  
如脫屣斯蓋示至公之要道未臻於出世也至於藏金  
玉於川岫棄琴瑟乎大壑卑宮菲食茨堂土階彤車非  
巧鹿裘靡飾斯蓋示物以儉亦未階於出世也解網放  
禽穿泉掩茵起泣辜之澤行扇暘之慈推溝之念有如  
不足納隍之心無忘宿寤蓋所以示物以為仁亦未階

乎出世也紫府青丘陁山漳水敦河上之道文悅岐伯  
之章句甘泉啓太一之壇嵩山置奉高之邑碣石刻羨  
門之誓不期作交門之歌斯蓋止愛久齡事在諸已篤  
而為論彌有未弘雖獲寵從之禪終墮長生之難徒階  
三清之樂不祛八倒之境豈若燃智慧之炬照生死之  
闇出五陰之聚升六度之舟浮衆德之海踐不生之岸  
於是莊嚴國界建立道場廣行利益開闡佛事驅彼衆  
生同濟仁壽引茲具縛俱入大乘九有傾心十方草靡

如憑津濟咸賴歸依曄乎若朝日之聞衆華霈乎若農  
夫之遇膏雨功德之翼已圓智慧之門必備以為般若  
經者方等大法峻極靡際深邃無底籠萬善乎無相兆  
九垓而無邊譬猶枝川派別入大海而同味衆芳雜彩  
到須彌而一色空空不著如如俱會不合不散無去無  
來種覺可生允茲佛母羣典弗逮是號經王乃欲震一  
音雨法雨示五眼引重昏昭暘紀歲立朽次星夾鍾應  
乎仲春甲申在乎吉日將幸同泰大轉法輪茲寺者我

皇之所建立改大理之署成伽藍之所化鐵繩為金沼  
變鐵網為香城照神光於熱沙起清涼於炎火千櫨截  
孽百拱穹窿紅壁玄梁華椽玉砌三階齊列四注周流  
上玉翼而捫天飛銀楹而蔽景虹拖蜿垂承甍繞檣蓮  
抽井倒冒宇臨窻彤彤寶塏既等法華之座峩峩長表  
更同意樂之國下鑿白銀之塹傍暉金薄之甗高門洞  
啓不因銅馬之飾寶殿霞開無假鳳凰之瑞金輪燭日  
妙臨淄之地下層臺累駕邁宛委之空飛夏宇疑霜温

室含煖雕樓之內滴動而響生洞扉之裏鶴歸而氣激  
幢號摩尼旛懸金縷盤徑十丈鈴圍四斛舒七寶之交  
枝流八功之淨水地芝候月天華逆風法鼓夜鳴聲中  
聞法瓊枝旦動葉裏成音妙德陽之宮麗未央之闡故  
銅欄三丈追嗤井幹玉樓十二遙恥神仙譬彼清涼之  
臺同符蘭臺之寺忉利照園之東帝釋天城之北故以  
辛壬癸甲綿蠻靈霽吁哉其不可狀鏘鏘盱盱瓌譎雜  
錯邈乎其不可名於是壁日揚精景雲麗色薰風徐動

淵露微垂後距屯威前節警列武較星連鴻鐘吐響運  
天官之法駕啓天路之威神百靈扶持千乘雷動六虬  
齊軫七斗垂暉雲罕乘空勾陳翼駕超光躡景日被天  
迴金蓋玉輦豹服鼉鼓織驪沃若天馬半漢綠弓黃弩  
象飾魚文攸飛案節不勞斬蛟之劍虎賁弋羽豈假鳴  
烏之射湛湛奕奕麟赫赫出乎大通之門天子降雕  
輦之貴行接足之禮頂拜金山歸依月面如聞萬歲之  
聲若觀六變之動於是乃披如來之衣登獅子之座均

百慮之紛總愍三請之慙懃啓真慧之深宗明度彼之  
弘教二諦現空有之津二智包權實之底大乘豁其靡  
礙道心究其歸涯因果之攝不運而行真俗莫求弗動  
斯到不以二法會乎中道盡佛淵海入佛法藏極脩妒  
之妙典研龍宮之秘法宣娑婆之奧旨闡衆聖之微言  
正水既沾邪難自息慧日普照毒霜並消除黑闇於四  
生遣無明於三界巍巍乎若彌樓之在巨海穆穆乎譬  
衆星之繞圓月於時天龍八部側塞空界積衣成座散

華至膝三千化穢土之質火宅有離苦之期惡道蒙休  
泥犁普息說說學侶濟濟名僧皆樂說如辯才智慧如  
身子踰乎青目黑齒高彼廣膝赤髭咸符瀉瓶之思竝  
沾染氎之施如金復冶似玉更雕聞所未聞得未曾得  
鬱搖動色請益無倦百司俱列簪履相趨豐豹焜煌華  
綬苒弱謂舍衛之集大林之講無以過也將令一一佛  
性逢了因而俱出一一佛土咸遣二而除三比夫歌南  
風尚黃老臨辟雍講孔宅么麼安足而語哉距於三月

甲辰法席圓滿如來放大光明現希有事雄雄吐色珠  
火非儔矐矐上映丹紫競發榮河恥其祥潤汾陰陋其  
暉影掩入殿之紫雲奪鴻門之妙氣昔法華初唱毫照  
普林般若聿宣通身盡笑王城之瑞千載更逢豈非聖  
主同諸佛身降茲妙相等諸佛力若符契焉猶秉淵默  
之謙虛弘懍焉之至誠為而不宰推而勿居以百姓之  
心為心非關諸已荷負無倦攝受四生皇太子臣綱視  
膳東廂親承大法以為西巡東狩讚頌以興柴山望祀

詠歌斯作況頂開而受露鞠躬而聞道敢述盛德之形容以為頌曰

玉牒悠復青史綿長道泐五勝風殊百王商丘命瑱姬  
水開璜河澄待聖海謚期皇方天譬地功歸有梁垂拱  
南面克已巖廊權輿教義製造衣裳九韶革響六樂改  
張儀鳳婉婉擊石鏘鏘廣修壁水洞啓膠庠輕軺徵聘  
旌帛搜揚蘭臺且富廣內斯藏芸香馥蘭綠字摛章文  
功既被武跡斯彰題雕臆鏤舌紫支黃南街請質北闕

來王飛旌集翰勒跡書狼銀車引附黑節招荒文同海  
截化普龍鄉西踰月窟東漸扶桑卑宮類禹解網如湯  
衢室納異明臺引良善旌弗卷諫鼓其鏜萬符集祉百  
神啓祥黑丹吐潤朱草舒芳珠懷鏡像星含喜光液池  
下鶴高梧集鳳赤熊旦繞素雉朝翔觀玉伯友訪道西  
王遊經建水巡指盛唐終非運出豈曰津梁我有無礙  
共向圓常玉鑿徐動金輪曉莊紫虬翼軼綠驥騰驤虎  
文駐蹕龍驂啓行闌干玉馬照曜天狼玄旌映日翠鳳

晞陽前飛格澤後擁陸梁風移霆掃參差焜煌峩峩寶  
座郁郁名香法徒學侶塵沙堵牆慈雲吐澤法雨垂涼  
三密不限四辯難量猶茲海寶譬彼山王慧流總被藥  
木開芒佛日出世同遣惑霜帝釋歌詠幽祇讚揚空華  
競下天琴自張山含影色地入毫光非烟繞氣陸藕開  
房澤普三界恩均八方巍巍堂堂為舟為航伊臣稽首  
萬壽無疆

玄圃園講頌 并序

竊以寶山峻極駘足未窺慧海遙波輕舟詎泛故以探  
沙亂妙類杵迷形百代同昏千年誰啓皇上託應金輪  
均符玉鏡低矜苦習續照慈燈鶴樹還春龍泉更曉玄  
水三祥丹陵瀉電功韜火宅德覆雲衢智慧之光猶初  
日照忍辱之力如明月珠天成地平遐肅邇澤漏無  
底化行靡外滄河鏡淥碧海調風停瑞氣於三辰汎祥  
煙於五節鱗羽被解羅之澤黎元沐仁壽之慈於是正  
化潛通法輪常轉類空境之傳虛猶懸河之瀉潤儲君

德彰妙象體睿春瓊視膳閒晨遊心法捷搦管摘章既  
媿娟錦綉清談論辯亦參差玉照夏啓憲德周頌慙風  
乃於玄圃園栖聚息心之英並命陳徐之士摳談永日  
講道終朝賓從無聲芳香動氣七辯懸流雙因俱啓情  
遊彼岸理愜祇園靈塔將涌天華乍落于時藏秋仲節  
麗景妍晨氣冷金扉霜浮玉管茲園邃密獨華勝地畫  
堂玉砌碧水銀沙鳥頡頏於瓊音樹葳蕤於妙葉液水  
穿流蓬山寫狀風生月殿日照槐煙網叨籍殊寵陪奉

塵末預入寶樓竊窺妙簡鳧興藻拊獨瑩心靈敢作頌  
曰

皇儀就日帝道昌雲化隆垂拱德曼鴻芬機乘八解道  
照三墳巍巍蕩蕩萬代一君其一重離照景玉潤舒華七

淨標美三善稱嘉降茲法雨普洽生芽漣漪義水照曜

文華其二芳園靉靄天宮類寶析論冥空玄機入道密宇

浮清重閣相藻日暎金雲風搖銀草其三肩隨接武握寶

靈珠皆抽四照並揆九衢顧惟多缺徒奉瑛瑜終如燕

石更似齊竽

其四

南郊頌有序

臣聞惟天為大聖人敬其德知幾其神聖人契其道故龍官弱言之后合揆於蒼昊鳥紀垂衣之君昭格於上帝莫不巍巍乎穆穆乎渙汗於綠篇氛氲於丹冊者矣我梁皇帝之御天下也乘燁祗之盛曜即璧月之遐照等乾覆之燾養合坤載之靈長四三六五之意十堯九舜之明名與功偕業將時並自撥亂反正伐罪弔民馮

玉几握金鏡君臨萬國於今二十有二載也緯天維理地軸移澆風於末俗反淳正於區中化不言而先顯教

不嚴而已肅流樂復雅遠符雲韶之世墜禮還章非因忠信之薄九垓同軌四海無波儲明變照儀天作兩三袞成作叶化台光麴蘖王風鹽梅帝載塵清世宴蒼兕無用其武功運謚時平鷓鷯咸修其文德桃林散甲華山弣刃玉門罷候紫塞沈鋒屠羊釣壑之士厭洗耳而襲簪佩版築藏巖之逸去燥穀而紆珩組異人俊乂既

間出而在官世鏡河仙亦雖容而廊廟蹇蹇同於多士  
諤諤比乎得人五典三墨既歲蕤於璧水九流八索亦  
繽紛於石渠畫一之政萬代表於時和三章之律百姓  
沐於仁壽於是龍光之地日浴之鄉紫舌黃支頭飛鼻  
飲自西自南無思不服欵關質子稱臣內向珠樹素禽  
越火枝之地銀甕邛杖踰沈羽之涘出赤野而連翩度  
玄沙之泱漭於是嘉祥被衆瑞登金人澤馬丹甌玉雞  
三角九尾四眉六足抽鋪地之九莖發端門之連理參

差於郊藪布濩於宮闕府無虛月史弗能記周稱黃鳥  
之旗夏有玄珪之錫無以踰此嘉祥方茲揔萃道洽世  
昌國殷民阜鄉知舜讓邑比堯封委粟西畝神絲被澤  
可謂我化若風民應如草我靜如鏡物動猶烟天子猶  
未明求衣日是不勸撤膳匪躬詢輿訪道鑿旗徐動棄  
千里而弗乘寶瑟無虞捐百金而不服廣行四等被慈  
雨於枯根大闡三明驚法雷於羣夢曲成萬物去殺愛  
生幽弊之民與蒼雷而共悅否滯之義同谷風而開杼

昆蟲得性跂蠹欣生三驅有緩前之禽九門無餒獸之  
藥至德之事如此太平之風如彼乃以恭肅神祇理通  
孝敬江左以來爽塏未闢爰命將作揆日載營三靈叶  
響百工咸事宛如神造儼類仙居沖秘隱嶙跨千畝於  
晉日閑曠麗遠吞七里於漢年五達四通廓郊彌野南  
瞻重嶽北眺芒嶺東臨灞澹西望舊豐紆餘委蛇丘陵  
起伏澎湃堯光山川異態飛梁邃宇洞燭穴懸紫殿仙  
宮霞騫鳥翥霧映倒梁日光踈鉞玉桃卷葉銀樹抽芳

百果千株三珠八柱朝葉與蜜露共鮮晚花與薰風俱  
落露禽乍聚望比翼之翱翔歸飛時宿聞同心之夜響  
故以熊熊灼灼炫兩明而仰七曜紛紛沐沐承五烟而  
帶三靈圓丘閒靜紫壇肅設五精之場千神之位八堦  
弘麗四維博敞宛若干仞狀懸流之仙館煥如五彩同  
瑤山之帝壇石牒神昌之瑞方臻金縷飛光之徵永固  
是雕是琢鄙茅茨之為儉非珠非玉啗甘泉之已奢望  
昔方今獨高千古沿襲異等質文斯中於是歲在單閼

星次訾陬律中太簇日惟辛卯特有事於南郊甸師清  
野封人遺宮朱幕夕峙帷宮宿設曉漢斜陰挈壺升漏  
天子御玉輅動金根八驥揚衡雙龍翼蓋雲罕徐迴鳴  
鏡韻響風承豹尾日映鶡冠萬騎天行千乘雷動石鎧  
犀衣之士連七萃而雲屯珠旗日羽之兵亘五營而星  
列鬱鬱阡阡震震填填充溢乎國都彌漫於鄠邑者也  
若乃迴輿降蹕薦禮帝儀揖太清秩羣望被大裘服山  
冕恭蒼璧之明祀穆靈壇之禋敬黍稷非馨明德惟馨

日曜彤精天澄翠色百僚師師九官濟濟千神叶福萬  
億均慶六典斯備三禮必該焚柴告成罔不欽若翠烟

升錄同河濱之瑞雲丹燎燭天若帝鄉之美氣雲門麗  
舞咸池廣樂已叶九韶之曲復諧六列之奏金匏既動  
望婉蟬之遊龍玉磬徐鳴觀參差之舞鳳桂鞬駕肩士  
女填噎接袂為幃連裾猶堵鼓腹擊轅行歌舞忭然後  
紆玉輦而謝書生登靈臺而望雲物欽明美化跨萬古  
於茲日廣運愉樂表千載於當今方當巡云云之禮啓

亭亭之業封天峇賸禮地徵靈南山之壽無極七百之  
基長固豈不懋哉豈不盛哉匪薄微臣謬與藩服馳心  
休禮秣馬之願無由徒罄編辭清風之藻多愧敢敷庸  
理獻頌十章其辭曰

元始道一渾德氛氲遙哉邃古曩矣初分磅礴地載清  
朗天文大人覩物生民樹君其一蛇驅隆準作樂垂衣皇

圖炤灼帝篆葳蕤廓寥中代合聖與誰於爍我后命世

天飛其二其玄默馭辯寂照秉真就雲握歷望日臨民謙光

履德義禮稱珍車書同軌天下歸仁

三期

章孔備盛化

弘道酌衢敬賓欽賢愛老變正是珍燭車非寶如海之

深如日之杲

其四

肅恭明神述聽前踵配天道尊迎陽義

重玄酒陶匏燔柴雲聳跨舜論韶籠堯稱拱

其五

赫矣郊

宮載惟靜謐肅肅禁闈陰陰仙室六戎列野八鸞照日

架殿星羅重宮霧出

其六

蒲萄金橘靈壽木難素奈開暑

貞檜陵寒山池壯麗階閣彤丹葉垂疊雨花落重巒

其七

康哉盛德美矣世豐三辰炳耀七政永隆五方來洎四

隩茲通懸繩度竿駕鹿追風

其八

既敷懋化復覩瑞滋金

車出野玉露霑墀紫槩神草華平瑞芝長愉汪濊永固

雍熙

其九

照天漏涖遠肅邇睦惠靡齊民恩彌比屋式光

惇史踰斯郁郁皇哉康哉同茲景福

其十

菩提樹頌

并序

竊以因緣假有衆生之滯根法本不然至人之妙理是以三界六趣遶業障而自迷八解十智導歸宗而虛豁是以能仁大師隨緣布道愍燄宅之既焚傷欲流之永

驚託白淨之宮照黃金之色居茲三惑示畫篋之非真  
出彼四門驚浮雲之易滅於是佛日啓法雷震設漸教  
降權迹三寶現世一道知歸大接羣蒼救茲未度法雨  
法水之潤等世界於無邊智燈智炬之光同虛空於莫  
限物因難量化緣將息林開白樹日映青枝悲哉六識  
沈淪八苦不有大聖誰拯慧橋皇帝體乾元之叡德合  
天地之純誠照玉鏡之神握太平之運吞虞孕夏罩漢  
籠周御六氣而子蒼生扇二儀而布亭毒緯樂經禮偃

武修文秋荼不設廢九律之嚴科春雨愛生解三驅之  
密網固以咸池之靈自失汾水之德知慙少陽懋善於  
元真蕃臣變和於槐衮八凱三座九棘四科之士內宣  
王事運策橫行專城推轂之將外守封疆一同文軌萬  
方共貫穿胸鏤臆之酋短身長臂之師南越鑠石北極  
天沙東邁日枝西踰月紀莫不梯峰挂迥越繩度之山  
航海跨深汎浮毛之浪奉方入貢進忠請職獻同心之  
鳥貢比肩之獸爾乃嘉祥競發寶瑞咸委靈芝滴露月

萃郊園義鳳仁虎日聞郡國如珠如璧既照燭於中畿  
若雲非雲亦徘徊於宮雉於是驅黎民於仁壽濟動植  
於幽隍歲樂民殷家給戶足班白不提挈童稚有謳歌  
從善如流應風猶草開農務本鑄刃銷鋒紅粒盈箱青  
蚨委貫上照天下漏泉天既成矣地既平矣天子乃均  
一子愍四先示正行之因標出要之路廣設道場大弘  
妙法涅槃寶棹接惑衆於背流慈悲光明照羣迷於未  
曉法輪遍乎大千清涼被於小葉故天人舞鳳去照園

而讚善菩薩飛象越香土而來儀五百寶蓋騰光自合  
十千纓絡懸空下墜龕室莊嚴國界殊特製三時之殿  
聳四柱之臺雖漢后望神之宮軒轅待仙之觀曾何足  
擬髣髴寶雲儀形等覺於是想成道之初建菩提之樹  
四海呈珍百工薦巧雕金鏤碧綴鏡懸珠製似雪山形  
同飛蓋四布垂陰五面益物名高滿月德踰普覆並豔  
千光之樹連英五色之華壁日垂彩玉帶生烟微風徐  
動寶枝成樂儼然妙色蔭此曲枝顯若金山尊如聚月

信女百味之初諸天四鉢之狀散漫祥草連翩青雀伏  
吐電之魔却擔山之鬼竒姿瓌質不可勝言此實生善  
之妙緣進行之深福當今盛美曩代未聞方應照德不  
窮懸諸日月巍巍永樂萬萬斯年敢作頌曰

綿史載觀靈篇眇鏡寶冊歲蕤帝圖掩映烏紀稱祥龍  
書表慶九州布德五絃作詠蒸哉至矣有梁啓聖功覆  
終古業高受命金輪降道玉衡齊政無思不服有德斯盛  
一乘運出五眼清淨稟識康歌昆蟲得性舜厨靈蓮堯

庭神英豈如道樹覆潤弘  
泱靡密垂光芬芳委疊時  
動百華乍開千葉現彼法  
身圖茲瑞牒海度六舟城  
安四攝惠澤既播淳風普  
叶休明智鏡清朗法泉百  
神嗟仰千佛稱傳榮光動  
照玉燭調年菩提永立波  
若長宣穆穆明后萬壽如  
天

馬寶頌 有序

武帝幸同泰寺捨身公卿奉贖還宮幸德陽  
堂宴羣臣設絲竹樂是月神馬出太子獻頌  
按轉輪王時自然生馬寶王騎出宮門飛  
行遠四海即日還宮頌稱馬寶指此也

皇帝應百姓之心副四海之願復履玉衡還臨億兆天  
地交泰日月貞明至理維新隆平方始遐邇壹體中外  
禔福含生欣欣若耘耰之逢夏雨懷情坎坎譬草木之  
值春風帝王之道超邁開闢睿聖之功殫歷邃古軒羲  
不足鑿枘堯舜不足憲章至哉大哉無得而稱也五月  
丁酉朔絲竹會于德陽之堂于時日進內宮星次鶉首  
仲夏之晷稍及陽城之圭蕤賓之鐘初應潁川之律縉  
雲旦卷南風晚扇惠氣入帷清陰周宇玉輿雲罕照日

充庭羽林中權分階列校簪笏成行貂纓在席昭天之  
樂金石鏗鏘報地之禮威儀肅省詔以馬寶示羣臣大  
僕効官趣馬掌贊三令五申承聯事舉八麗四圍給役  
相趨暉煜金鑣陸離寶勒天地無疆之德永星致遠之  
功鸞眄善鳴龍儀美稱沸毅權竒之威趨攄抑揚之態  
足轉驚電眼流含燭霧噴紛霏流沫飄灑數千為壽豈  
待原蠶之禁萬里一息不藉杜衡之草王良不能控其  
衡策伯樂不能辨其文機方知總轡崑岑周非吾馭張

樂大野夏有慙德豈止沈河用璧獨有綠文之稱盛德  
在木偏受蒼龍之名至於干將寶劍遙服晉鄭之軍蓮  
花烏玉騰威大海之際況乎馬寶義實踰之方當夙沙  
自歸滑橋屈膝欵關入塞偃武修文去病無出師之勞  
充國罷議邊之畧五律成珍九河如鏡臣謹按瑞應經  
彌勒成佛經中阿舍經覽愚經並稱第三之馬者三千  
歲華子云堯漢皆得馬者堯漢皆火德正斗南方乘德  
而至也豈非聖德汪濊皇風洋溢研機洞元備禮達義

是以天不愛道白馬嘶風王澤効祥朱鬣降祉比夫圓  
蹄方足躑躅在郊風嘯電奔聲遊處圍五彩依樹三雀  
登巢安髣髴於當今弗擬議於休應百辟卿士咸稱萬  
歲伊臣不佞結慶雲霄親承詔旨預觀寶瑞手舞足蹈  
贊揚不足宴禮斯畢退而作頌其辭曰

帝廣運德欽明儀郊升道形聲德為軌仁作經璇璣正  
大階平割五禮和六英開四攝行八政轉輪皇飛行聖  
愍含識資惠命引蒼生歸法性菩提真般若淨七寶均

萬邦寧述悖史觀陳詩域中大惟聖期聞玄妙復孝慈  
解流澤隨因時刑已措績咸熙三農盛九穀滋萬祇悅  
八神怡律有節歷得天景星曜慶雲連珠為月醴為泉  
民何幸值皇年乾道應坤馬來度玉關升玉臺鏤錫煥  
鸞鑣迴樂雲轉堞塵開千天駟百龍媒永伏阜掃駒駘  
秣瑤粟委芳芻九夷欵四表清眈胥樂興頌興

銘

大愛敬寺刹下銘

有序

夫波若真空導羣生於假域涅槃有岸引未度於無邊  
應此十千現茲權實隨方攝受孰能弘濟皇帝照盡神  
原心疑寂境深慈降跡下荅蜚螭握鏡斷鼈經綸世阻  
故能天地貞觀日月重光業曠四弘功侔十力慧雲旦  
聚浸澤灑於遐外法炬夜明揚光燭於梵頂因心孝愛  
道契神明昭事誠享曰隆哀敬金車荅瑞追德慶於虞  
年甘露登祀比嘉祥於漢日既而理局遙圖事稽終典  
思所以功超域外道邁寰中廣樹大緣增隆勝善事等

淨名齊方便於圓極跡均妙掌襲兩寶於冥因乃于鍾  
山竹澗奉為皇考太祖文皇帝造大愛敬寺焉惟茲神  
岳勢負龍形均太華之四成狀彭門之雙起曲澗推移  
激水精之浪清風窈蕩散雲母之竹顯帶皇邑標地德  
之慶雲彌望帝躔矚神居之敞麗昔鴈泉之願真如所  
鶻鷲形之岳大聖攸居創此伽藍同符往跡以普通三  
年歲次壬寅二月癸亥朔八月庚午建七層靈塔百旬  
既聳千龕乃設漸山啓基踰於禁森國士金刹長表邁

於意樂世界珠幡轉曜寶鈴韻響聞聲者入道見形者  
除累仙衣梵帶去鴈塔而來遊天香風笙辭鶴城而下  
集靈祇叶贊有識歸依四將五龍翹勤翼衛八臂三目  
頂帶護持雖復劫盡恒沙衣消巨石儼如常住妙相長  
存作銘曰

朕哉睿聖至矣炎精功昭鳳紀德契雲名冥符七覺爰  
極四生儀形懋典道駿有聲皇心閔睇理篤天誠八萬  
神構二四雲并懸梁浮柱沓起飛楹日輪下蓋承露上

擎玉函蘊色珠髮韜明花窟炎聚石影光輕天下欽仰  
幽顯贊成法舟斯濟惠海方清淨界無毀金地永貞

行雨山銘

巖畔途遠阿曲路深猶云息馭尚且抽琴茲峯獨擅欽  
崎千變却繞畫房前臨寶殿玉岫開華紫水迴斜溪間  
聚葉澗裏縈沙月映成水人來當花藤結如帷磧起成  
基芸香馥徑石鏡臨墀

明月山銘

迢遞峰長威紆嶽聚既正雲門兼同天柱非競小山寧  
論大庾豈學土龍詎須石鼓緞色斜臨霞文橫豎

釋迦文佛像銘

至矣調御行備智周滿月為面青蓮在眸心珠可瑩智  
流方普永變身田長無沙鹵

彌陀佛像銘

玉蓮水開銀花樹落惟聖降神拯彼沈漠

維衛佛像銘

灼灼金容巍巍滿月永被人天常留花窟

式佛像銘

影生千葉花成四柱塔象單留龕童雙舞

迦葉佛像銘

慧雨自垂仁風永扇照曜白毫半容月面惡因有滅善  
燈無變

梁安寺釋迦文佛像銘

帝為知仰皆規面象敬模螺髮式圖輪掌信根有五覺

杖云七仰福靈祇上生兜率

杖錫銘

妙節嘉光遊聖振灼排空霧轉騰雲鳳躍永異玉神長  
踰金錯

書案銘

刻香鏤彩織銀卷足照色黃金迴花青玉漆華映紫畫  
製舒綠性廣知平交雕非曲厠質錦帷承芳綺縟敬客  
禮賢恭思儼束披古通今察姦理俗仁義可安忠貞自

燭鑒矣勒銘知微敬勗

鏡銘

金精玉英冰輝沼清高堂懸影仁壽摘聲雲開月見水  
淨珠明

紗扇銘



碑

吳郡石像碑

蓋聞軒后之圖載浮河洛秦王之璧更涌滄溟昭覃之  
洲乘清源而西泛蓬萊之岫闕流而南徙沉夫道由

慈善應起靈覺是以無方之迹隨機示現無緣之力因  
物成感晉建興元年癸酉之歲吳郡婁縣界淞江之下  
號曰滄瀆此處有居人以漁者為業掛此詹綸無甄小  
鮪布斯九罟常待六鼈遙望海中若二人像朝視沈浮

疑諸蜃氣夕復顯晦乍若潛火於是謂為海神即與巫  
祝同往祈候七盤圓鼓先奏盛唐之歌百味椒漿屢上  
東皇之曲遂乃風波駭吐光景晦明咸起渡河之悲竊  
有覆舟之懼相顧失色於斯而返又有受持黃老好尚  
神僊職在三洞身帶八景更竭丹款復共奉迎尊像沈  
軀沒而不見經歷旬日遐邇普聞吳縣華里朱膺清信  
士也獨謂大覺大慈將宏化迹乃沐浴清齋要請同志  
與東靈寺帛尼及胡伎數十人乘船至滬瀆口頂禮歸

依歌頌贊德于時微風送棹淑景浮波雲舒蓋而未移  
浪開花而不噴雖舟子招招弗能遠驚而靈相峩峩漸  
來就浦仰覩神像嶷然雙泛非因鷁首詎假龍橋豈藉  
銀連寧須玉軸背各有題一名維衛一名迦葉於是時  
衆踊躍得未曾有復懼金僊之姿非凡所徒試就提捧  
豁爾勝舟指燕宮而西歸望葑門而一息道俗側塞人  
祇協慶膺家住近通玄寺迺孫權為乳母陳氏之所立  
也亦一邦之勝地胥山之神塔乃遷像於此寺武夫數

百咸不能勝共怪曰朱膺帛尼二人之力而能捧持不覺為異今人工甚盛確乎不移此必精誠弗能致也乃復竭心同時稽顙然後乃動至自舟中故知據井夜飛實無以異石不能重有覺憑焉後有外國沙門釋法開來稱彼國衆聖所記云東方有二石像及阿育王塔若能恭往禮覲滅無量罪免離三塗禮已而去中大通四年歲在壬子臨汝靈侯奉勅更造銅光二枚其一高九尺其一高八尺五寸銅邁丹陽恥論劉向之術區選

攻金無俟嵇康之鍛既鑄既鍛是磨是銑擘如光定湛  
似日輪亦當遠照三千普瞻色像遙覩十方俱聞說法  
豈止惜命小鳥欣入影中重罪衆生還逢愛日而已哉  
吳郡僧正慧法師深修五定淨持七支於三寶中盡力  
宏護立摩尼之勝殿製飛行之寶塔至於莊嚴妙色實  
有厥徵夫魯聖云亡尚追儀於有若楚臣殞世亦託似  
於優孟放勳之后更圖長樂之畫文命之君不闕稽命  
之禊或傳諸往牘或布在前司或贊述盈耳或壽宮虛

置況遠追應身近規靈迹不銘不勒何以稱揚乃為銘  
曰

巍巍天像堂堂最勝慧日獨圓無生永證愍此魚鈎傷  
茲螺孕乍動慈舟時延寶乘留住待緣獨有傳應傳應  
伊何寶茲靈像履水晨遊凌濤夜上七衆有憑九垓咸  
仰照此真容開斯俗網千輪足起萬字胸書身橫五分  
衣刻三銖嗟爾末俗心王所驅顙浮水沫命役馳駒宜  
宏希嚮必盡勤劬覩相塵滅聞聲惑祛湛然神跡長處

全吳

招真館碑

夫東瀛淥水三變成田西嶽靈桃千年未子尚以星起  
牽牛部首迢遞律生甲子氣數杳冥況復上遊玉清損  
之又損高排金闕玄之又玄豈言象之能詮非時節之  
所辨海虞縣者則虞農都尉太康置其宰境有虞山越  
絕書云巫咸之所出也高巖鬱起帶青雲而作峯瀑水  
懸流雜天河而俱灑雖日門採藥之地楚望懷椒之歌

湯反流沙之魂錦飾汾陰之鼎無以喻焉其峰則有石  
城石門虛峻自然不度句吳之馬神功挺起豈似岡陵  
之畫魏后水城夜陣權息長安慈石浴鐵暫流較跡比  
期優劣斯遠道士沛郡張君諱道裕字弘真即漢朝天  
師陵十二代孫天監二年來至此岫栖遁十有餘載夜  
忽夢見聖祖云峰下之地面勢閒寂宜立館宇可以卜  
居裕師潘洪隱始寧四明山無何有人耳長髮短云從  
虞山招真治來言訖忽然不見潘馳信報君君因辭山

舊居而以夢中所指峰下之地即以為治故號招真高  
臺迴立有類玉臺之山長廊宛轉還如步廊之岫柱削  
芳桂豈俟開陽木飛材選海檀無勞豫章神拔黃庭司  
命之府有類玲瓏米陵赤石之觀同符弘敞遠望仲雍  
而高墳蕭瑟旁臨齊女則衰壠蒼茫蘚尋千仞之木氣  
叶星晷華飛五香之草形圖宮室帷葉綵花卷舒蹊徑  
陽桃侯棗榮落巖崖樹息金烏簷依銀鳥鳳將九子應  
吹能歌鶴生七歲逐節成舞旭日晨臨同迎若華之色

夕陽斜影俱成拂鏡之暉玉礎微潤應山雲於高牖鳴  
籟徐響引和風於空谷方當專氣致柔入無為之境周  
行不殆窮混成之致茅子算歸輟轡無已魏姬宴罷留  
駕不還何止持節變淮南之金傳符蔣北鐘之稻明月  
蛟龍之騎驅之使鬪四銖七子之鏡引以成刀散季齋  
之羽起雄鳴之霧而已哉乃為銘曰

玉龜二始金書八會道浹地心功浮天外故帝可小唯  
真能大德起同塵善生塞兌物寶自然人符交泰掩映

綠蘿穹隆紫蓋仙治之美此焉為最雄柱千步陽臺百丈水均下矚山踰高掌野寂雲興禽繁山響升虹夕栖豐雷朝上元陽作石竹龍成杖書藏玉匣藥蘊銀筒燒鉛雜鯉折桂和葱羽衣可服雲輶易通斧柯雖朽碑石無窮

此篇載姑蘇志題曰招真治記治者本道書言太上下二十四治付張道陵布法於後嗣後盡立治

於立都故稱治也按陳馬樞道覺論張裕起招真館梁簡文為製碑故今亦沿之曰招真館碑

藝文類聚截

其銘中數語稱梁簡文招真館銘其為簡文筆無疑姑蘇志訛為昭明今正之

善覺寺碑

蓋聞在天成象倬彼雲漢在地成形嵩高惟嶽蒼蒼幹  
運靈槎猶且去來巖巖峻極巫咸可以升降穆貴嬪宿  
植達因已於恒沙佛所經受記荊有緣娑婆降跡斯土  
行邁英皇德降華附河南望浮雲之瑞新野表升天之  
祥光前絕後建茲福地乃於建康之太清里建善覺寺  
焉大通元年龍集己酉有令使立碑文未獲構譔居諸  
不息寒暑推移軒曜夙傾前星次掩歲在諏訾始得補  
綴何言之陋何事之隆竊等仲由空悲負米之哽復異

桓良終無維山之日永言纏纂獨咽丹心銘曰

效彼毗城建斯福舍四柱浮懸九城靈架重欒交峙迴  
廊遙迓掩映花臺崔嵬蘭榭陽燧暉朝青蓮開夜

慈覺寺碑

竊以易表含貞記稱厚載龍星啓曜璧月儀暉是以河  
外黃雲沙傍崩鹿故能發緯伊緒重闡劉系亦有觀津  
美於西漢扶風盛彼東京未若樊川之邦宛葉之境休  
祥茂祉獨繁前跡莊姬流譽之所烈后興業之地南陽

稱其何氏新野猶曰鄧家逖彼遐蹤復履今慶貴嬪金  
聲早振淑範增徽才實母師行為女楷窮茲四德洞彼  
六經溫明內湛慈慧天發綱綴慶璇枝聯休紫漢幸得  
誓無負斧仕重束薪實以契濶言提綢繆善誘事具徒  
居義深則盼而叨恩作牧釁結幽祗一訣椒慈長違寶  
幄風枝弗靜陟屺何期祗奉儲訓謬茲刊撰道長業大  
遺範事隆嗟油素之可捐懼故老之難述

相宮寺碑

真人西滅羅漢東遊五明盛士並宣北門之教四姓小  
臣稍罷南宮之學超洙泗之濟濟比舍衛之洋洋是以  
高簷三丈乃為祠神之舍連閣四周並非中官之宅雪  
山忍辱之草天宮陀樹之花四照芬吐五衢異色能令  
扶解說法果出妙衣鹿苑豈殊祗林何遠皇太子蕭統  
自昔蕃邸便結善緣雖銀藏蓋寡金地多闕有慙四事  
久立五根泗川出鼎尚刻之果之石岷峨作鎮猶銘劍  
壁之山矧伊福界寧無鐫刻銘曰

洛陽白馬帝釋天冠開基紫陌峻極雲端實惟爽塏栖  
心之地譬若淨土長為佛事銀鋪曜色玉礎金光塔如  
仙掌樓疑鳳凰珠生月魄鍾應秋霜烏依交露幡承杏  
梁牕舒意藥室度心香天琴夜下紺馬朝翔生滅可度  
離苦獲常相續有盡歸乎道場

神山寺碑

天地始終愆長不極劫數沙塵寂寥誰辯雖鐵界銅圍  
如影如約補石擎金隨生焰滅獨有鷲岳靈境淨土不

燒螺髻金質聲聞難覩故髮塔喜園流名天上耆山鵠  
苑布跡人中自非莊嚴妙土吉祥福地何以標茲淨域  
置此伽藍皇太子殿下幾圓上聖智周物外澄明離日  
照影春星長歌安勝表察書之獨見馳道迴車騫班輪  
而不絕銘曰

關號天井山稱地雌碧雞金馬越瀆梁池懷靈蘊德孕  
寶含竒此亦僊岫英名遠擣昔有鷲窟不燒淨土邁彼  
高蹤構茲法宇引葉成帷卽樹為柱石砌危橫崖階斜

監

吳興楚王神廟碑

昔者武王詢於太公五神之禮正伊陟贊於巫咸三篇  
之義作抑又玄矩司於坎宮漢興北時黃虵感於通夢  
秦作西郊幽則鬼神其來已尚楚王既弘茲釋教止獻  
車牛既舍黃駒安俟駢角掌擊無左滌之勞牧人止福  
衡之務周房殷俎惟有玄澗芳芝玉斝瑤樽止陳丹柱  
清酌漸符不殺之教方行大士之心比夫黃樹赤光紫

衣朱髮茂矣哉王制云山川神祇有不舉者為不敬太  
守元景仲稽諸古典於茲往烈永傳不朽式樹高碑翠  
石勒文事偕神掌靈龜負字還擬洛書

長沙宣武王北涼州廟碑

黃曲之祀九井尚慙洙水之堂七壁猶在豈非德含體  
氣禮降空桑蒸民仰其立功太上懷其貴德公諱某蘭  
陵人皇帝之長兄也命世降靈峻極開著宗百川而成  
海倍萬俊而為英為南梁北秦二州刺史陽陵黑水改

號難堪加以岳牧遷迴軍民徙散同高闕以為塞象玉  
門而置關三尉寢謀六屯罷業功同疎勒之守備甚即  
墨之堅圍公臨危制變殷如敵國是以六角摧峰兩賢  
釁鼓指撓則破勅敵叱咤而靜邊塵公德應大賢照惟  
殆庶如鐘賚叩似鐸發聲含朝陽於千仞散風行於萬  
頃神武所固士卒忘水火之難箠醪所驅小大一死生  
之志微管之風餘芳無絕人畏其神德音不泯梁秦二  
州刺史宜封侯條刺舉漢陽親覩遺愛有表請立碑置

廟天子許焉反宇飛風伏檻含日參差丹桂周流紫房  
躩踞刻獸下臨網戶菡萏荷華傍連屈屋庶使邊韶所  
立之石豈稱高於陳郡袁逢所勒之字非獨擅於華陽  
乃為贊曰

帝圖開道皇源配天功書綠字事燭青編天漢之陽黑  
水惟梁如仁永播流詠寧忘扶風高碣召伯甘棠餘芳  
無泯望古可方構斯象室循茲洞房琉璃照戶璧玉開  
堂秋條下葉春卉含芳九微夜火百味朝漿

連珠

被幽連珠三首

吾聞道行則五福俱奏運開則六極所鍾是以麟出而  
悲豈唯孔子途窮則慟寧比嗣宗

吾聞言可復也仁能育物是以欲輕其死有德必昌兵  
踐於義無思不服

吾聞有古富而今貧可稱多而賑寡是以度索樹下獨  
有衰神松柏橋南空餘白社

墓誌銘

華陽陶先生墓誌銘

維大同二年龍集景辰克明三月壬寅朔十二日癸丑  
巳時華陽洞陶先生蟬蛻于茅山朱陽館先生諱弘景  
字通明春秋八十有一屈伸如恒顏色不變有制贈以  
中散大夫諡曰貞白先生遺舍人主書監護喪事十四  
日巳時窆于雷平之山若夫真以歸空為美道以無形  
為貴不知悅生大德所以為生不知惡死谷神所以不

死妙矣哉隱顯變化物莫能測既而岫開折石天墜玉  
棺銀書息簡流珠罷竈九節麗於空中千和焚于地下  
仙官有得朋之喜受學振臨谷之悲余昔在粉壤早逢  
圯上之術今筮元良屢稟浮丘之教握留符而惻愴思  
化杖而酸辛乃為銘曰

無名曰道不死為仙亦有元放兼稱稚川遁形解化自  
昔同然猗歟夫子受錄歸玄梨傳苑吏書因賈船虎車  
照景蜺拂凌煙餘花灼爍春澗潺湲鬱鬱茅嶺悠悠洞

天三仙白鶴何時復旋

徵君何子哲先生墓誌銘

先生履玉燭之禎氣應大賢之一期實生而知機撫塵  
斯庶敬非習起孝乃因心聚徒教習學侶成羣與沛國  
劉猷汝南周顥為友陸璉賀瑒之徒更道北面永明中  
王文憲儉受詔撰禮未竟而卒屬在司徒文宣王王以  
讓先生因廣加刊緝故以含文燕居說六典五恩之義  
或齊侯所不鎮孟嘉所未知皆折茲大物成此良教小

人道長每諷考槃之詩君子道消便執天山之筮乃毀  
車挂冠拂衣東嶺始居若耶來從秦望今上經綸天地  
權輿鼎業始徵為軍謀祭酒實允文若之舉且光彥先  
之選又徵特進右光祿大夫高尚其事確乎不拔玄纁  
徒往束帛虛歸而給白衣尚書祿固辭不受卒窆乎其  
山正衾在殯啜鏤器與玉衣堯典入棺恥密章及書綬  
知與不知並懷惋愴咸以人亡素楷禮墜文章洙泗頽  
經扶風罷學關西疑聖之德自此長淪高松引風之氣

於茲永息余昔在朱方亟枉翰跡欽風味道迄淹歲時  
既而位阻桂宮塗乖咫尺不獲擁經步至問春卿之病  
徐輪三反入杜夷之舍痛祥雲之滅采悲列曜之晞暉  
追勒高鄉乃為銘曰

文範高世玄晏絕倫復有令德遠之與均誰與均此嗚  
呼哲人第五肥遁餘軌尚遵司空開學其風不泯傳茲  
孝敬曰悌且仁氣高瓊嶽心虛谷神括羽儒圃舟輿席  
珍既遊慧水兼引法輪談扇猶在鳴琴尚陳如何不慙

德素長淪寂寥巖穴荒涼渭濱橋曰隻雞徐稱酌素金  
欽夫子風期夙著蓄思含毫傳芳寫譽沈礎雖貞玄泉  
無曙

庶子王規墓誌銘

玉挺藍田珠潤隋水價重連城聲同垂棘偶應龍之籥  
影等威鳳之羽儀名理超於荀王博洽侔於終賈稍遷  
侍中佩玉璽於文昌珥金貂於武帳文雅與綺縠相宣  
逸氣並雲霞俱遠副君取敬杜夷時迴晉儲之駕追嗟

徐幹亦降魏兩之書爰發睿辭為銘云爾

七畧百家三藏九部成誦其心談天其口勝氣無儔高  
塵誰偶榮珪掩采靈劍摧鋒宋郊淪鼎洛水沈鐘玄扉  
不晝幽夜恒冬

戎昭將軍劉顯墓銘

繁弱挺質空桑吐聲分器見重播樂傳名誰其均之美  
有髦士禮著幼年業明壯齒厭飫典墳研精名理一見  
弗忘過目則記若訪賈逵如問伯始頽脫斯出學優而

仕議獄既佐芸蘭乃握搏鳳池水推羊太學內參禁中  
外相藩岳斜光已迫殞彼西浮百川到海還逐東流營  
營返魄汎汎虛舟白馬向郊丹旒背鞏野埃興伏山雲  
輕重呂掩書墳揚歸元冢爾其戒行途窮士壘弱葛方  
施叢柯日拱墜柳萋春禽寒斂翫長空常暗陰泉獨湧  
祔彼故塋流芬相踵

長沙宣武王碑銘

金表龍符綠地龜圖且稱瑞漢實曰開虞於昭帝緒蟬

聯厥初有微玄水亦作司徒重擔偃蹇曲注逶迤重攄  
鳳翥桂棟蓮披文檀晚麗采節晨輝春藤絡戶寒菊臨  
池惟馨惟德無絕於斯

安成蕃王墓銘

許氏猶龍荀家鳴鶴豈如宗子分聯華萼對策雲臺觀  
書麟閣官美登朝文高入洛得意琴書忘言丘壑

中書令臨汝靈侯墓銘

昔太祖時其惟宣武講道開天儀嵩作輔是曰邦茅藉

規承矩如康嗣衛似禽居魯息轡巖隈塗窮夜臺靈檐  
永閭松路方開草茂故轍松挿新枝月明泉暗暑往寒  
來

儀同徐勉墓銘

朱弓表瑞寶劍攸歸長瀾斯注爪徒含輝舉直斥偽校  
名責實朝有進賢野無遺逸違天即地歸幽去明空谷  
傳鼓哀風送鈴

太子舍人蕭特墓銘

威鳳五色朝陽千仞孫枝發響將維流韻馥哉若蘭頌  
矣懷熊瑾既誕子恒乃歡肩銀鈎之巧重世適雋況此  
臨池蟬輕露潤丹旒輕飛哀歌徐引壠水春帷山雲晚  
陣

湘宮寺智菴法師墓銘

嗟爾名德超然有暉五塵夙離三脩允依戒珠靡缺忍  
鎧無違智燈含影慧駕馳駢若韜山金如苞海寶德邁  
西河聲踰東道伊時傾蓋于彼朱方不期而遇襄水之

陽掩此方墳悠哉泉下鬱鬱翠微遼遼平野新盡火滅  
歸真息假

同泰寺故功德正智寂師墓銘

峰頽木朽波逝江潭山川若此人何以堪亦生亦滅如  
壑如舟千齡俱盡萬古誰留惟茲大士才敏學優幼捐  
蹈火早去吞鈎法雷能響懸河必訓辨才可匹妙德難  
儔

宋姬寺慧念法師墓銘

電逝生危舟沈道滅石圻亡儒星開殞哲是曰人龍亦  
號僧象慧氣素昭英賢夙上善渡愛河能褰欲網如彼  
高山法徒斯仰如彼澄波不測深廣

甘露鼓寺敬脫法師墓銘

岌岌緣假昏昏大夢六塵遠飛四流長控猗嗟大士慧  
舟法棟早擅人龍夙標威鳳善堂間構燈王布席辨河  
流水辭峰積石寂寥兩樹悠漫三泉神明何託暗石空  
傳

淨居寺法昂墓銘

篠蕩含聳蘭蓀表質甘露已凝智泉斯溢頓轡中衢息  
棹修渚隙陋白駒藤緣黑鼠同志酸傷交朋哀楚

誄

司徒始興忠武王誄

皇源地闡帝業天維於穆忠武光國之基爰自弱齡英  
明播越玉潤水鮮山靜雲發帝曰爾諧僉議彼屬推轂  
兩江建旗三蜀將旋上國戀結四民三鱣表服二鹿隨

輪方變正袞永範時規天弗報善哲人其萎響哀輓於  
北邙去承明而不入望參差之流影聽潺湲之雨泣

哀辭

大同哀辭

大同字仁洽予之第十九子也生於仲秋殞於冬末悲  
夫潛慟結於心愁眉慘於外夕坐於是申旦當食以之  
不甘客有謂子曰死生常也夭壽命也陳蕃所憇之家  
久傳紀錄之歲華歆所聞之語已定北陵之期上聖所

以忘情賢者所以達節將何戚焉予對之曰觀其明眸  
豐下玉色和聲豈不登髻歲而擬觸藩及紈袴而知折  
李靈心摧於毫末慧識挫於趾步庶方悟於來途遂窮  
魂於短日豈不傷哉乃為辭曰

含精鬱抑歎嗟何極云誰之悲悲子弱息實天道之偏  
頗觀賦命之殊舛彼神祭之靈長獲萬春之悠緬有舜  
華之照灼寄一朝之浮命始夢熊而非吉遂設弧而表  
慶驗天蘭之所受知地井之可映愛萱草之有徵欣赤

第之在詠信歡慰之未幾悼天零之云及乃變樂而為  
悲遂改笑而成泣昔珠襦之交舒又金香之相襲藉綺  
茵於弱肌隱孩笑於羅幃今獨親於元壤亦何痛其如  
之憶餘態而心楚想媚質而迴腸藥尚殘而染地衣猶  
襞而在牀卷金屏之四葉開銀函之九羊忽徘徊而想  
像曾何時而不傷於是風景暮鍾氣嚴晚候葉蔌蔌而  
走階水萋萋而鳴漏月半鏡而開河雲羅柱而下岫燈  
發焰而吐花火含光而成就金鹿之恨涕沾衣金瓠之

哀還掩扉猶茲紫山明玉碎譬彼西都芳草腓終無逐  
浪鳧船反何時復聞龍種歸

文

悔高慢文

弟子蕭綱又重至心歸依三寶竊聞禮稱弗傲表洙泗  
之遺文經云不慢驗踰閤之妙典故一遇恒神陵伽尚  
生餘習上賓天帝淮南猶有誤辭亦有才曰隱淪調惟  
高俗猶足座痺晉君立前齊主況復道隆三學法兼五

衆如過前殿似出北門而不密室致恭遺弓接足敢藉  
勝緣願起弘誓從今日始乃至菩提於諸出家悉表虔  
敬方欲削除七慢折制六根賓頭下步庶無厥咎耆達  
棄車方思景慕幽顯大衆咸為證明

六根懺文

今日此衆誠心懺悔六根障業眼識無明易傾朱紫一  
隨浮染則千紀莫歸雖復天肉異根法慧殊美故因見  
前境隨事起惡今願捨此肉眸俱瞬佛眼如抉目王見

淨名方丈之室多寶踴塔之瑞牟尼鷲嶽之光彌勒龍  
華之始常遊淨土永步天宮耳根闇鈍多種衆惡悅染  
絲歌聞勝法善音昏然欲睡聽鄭衛淫靡聳身側耳知  
勝善之事樂之者希淫靡之聲欣之者衆願捨此穢耳  
得彼天聰聞開塔關鑰之聲彈指馨咳之響諸佛所說  
悉皆總持香風淨土之聲寶樹鏗鏘之響於一念中恍  
然入悟鼻根過患彌復頑嚚耽染六蘭流連百和鬱金  
易著薝蔔難排雖復一薰一猶叶性難遺空中海上彌

不自覺至如雕鑪在彼翠霧霏烟識染相牽彌生織累  
所以螂蛆甘帶自謂馨香烏鷄嗜鼠不疑穢惡今願捨  
此鼻根得彼天受振裳躡步跨旃檀之迴林提囊拭鉢  
捧香積之寶飯長離穢濁永保清升舌根障重染惡尤  
深毒刺爭興惡蛇競起既貪五黃六禽之旨又甘九鼎  
八珍之味所以焚山破卵涸水枯鱗黿臃不斟有染指  
之過羊羹不及致入陣之苦雖復鷓臍鹿胃猶不稱甘  
鳳肺龍胎更云不美雖羅鼎俎未必皆嘗在彼衆生於

命已酷或復間朋亂友破俗傷真變紫奪朱反白為黑  
所以讒言三至曾母投杼端木一說越霸吳亡故知三  
寸之舌未易可掉駟馬既出於事難追願斷煩惑入清  
淨境既同阿難乞乳之譏又等淨名寂默之致餐禪悅  
之六味服法喜之三德形恭心到永趣菩提身根頑觸  
唯貪細軟質體塵礙不重戈矛莫不愛我輕他陵人傲  
物縱此裸蟲不羈醉象六塵四倒自此而生五蓋十纏  
因斯而致所以象簞清潤遨遊於夏室重衾狐白温煦

於冬房結駟廣廈動靜必安鷓首翠樓去來有託所以  
三業之過出自機關四大假成豈有真我願捨此畫瓶  
得彼金色淨寶珠之法飾煦瑠璃之慧體長歸五分永  
等十身意識攀緣其罪山積險同夢幻譬若猴猿懸鏡  
高堂一念難淨走丸索上百慮先馳至如二十五有紛  
繞不息九十八使驚駑無已所以灰心滅智行拔于三  
乘風禪露飲道高於六度今願斷此意根祛累斯盡心  
當恬泊洞照無生一切衆罪悉滅俗門三界異途歸之

真域懺悔已竟誠心作禮

唱導文

夫十惡緣巨易惑心塗萬善力微難感靈性是以摩鉗  
赴火立志道場薩埵投身必之妙覺衆生積染流浪不  
歸苦海易沈慈波空蕩渴愛與生死共門無朋與結網  
同路各趣百非纏茲四苦人思戮力昭彼三明是以如  
來因機致化如大醫王隨病施藥當今皇化之基格天  
網地扇仁風於萬古改世季於百王覆載蒼生慈育黎

首天涯海外奉道餐風抱嘯吹脣含仁飲德民無賢肖  
愛均一子衆等宜各克已丹誠澄心慊到奉為至尊敬  
禮娑婆世界釋迦文佛歡喜世界栴檀德尊水精刹土  
月電如來寶明世界山海慧佛奉願聖御與天地比隆  
慈明與日月齊照九有被康哉之澤八方延仁壽之恩  
玉燭之美日著遐方擊壤之歌遍聞天下敬由心起五  
體所以外恭情發於中六識所以單到故一善染心萬  
劫不朽百燈曠照千里通明憑法數安積善延慶今日

幸遇茲訓誘豈得不罄竭心途奉為皇太子敬禮東方  
寶海南方燈明西方無量壽北方相德奉願離明內映  
合璧外和玉振雲浮金聲海鏡日朝顏色四善流風既  
擅溫文之德實著監國之重蒼生飲德有識餐仁燮和  
內化事炳周經讚德含章訓高惇史故以配正奉天表  
七教於仁德宣風緝惠闡六服於溫慈各宜攝心奉為  
貴嬪歸命敬禮五十三佛三十五尊當來賢劫千劫在  
百七十奉願月相與萬善同休金聲與四時並祐興七

覺以炳照罔十智於當樂閨守奉仁宮儲欽德暉同疊  
壁煥若崑瓊蓋聞嵩高惟嶽作屏皇家宗子維城克固  
磐石所以戚均魯衛任等蕭曹三台正席坐而論道九  
棘勤王恪居連事宜各運心奉為臨川安成建安鄱陽  
始興豫章及南康廬陵湘東武陵諸王家國戚屬六司  
鼎貴歸命敬禮舍利形像菩提妙塔多寶踊現釋迦碎  
身奉願心鏡凝深身清岳峙克隆帝祉永茂皇枝衆各  
一心歸命三寶三界異術五道分逕天人植業各歸一

果鬼神牽報事炳冥途上善華果既乖正力五濁煩心  
彌多惱累雖復聰明正直三牲之祀未虧陰陽不測六  
根之滯猶染衆等宜各露誠逮為天龍八部護塔善王  
乃至修羅八臂摩醯三日盡為敬禮尊經正典清淨波  
若究竟涅槃法華會一之文淨名不二之說願一切善  
神永斷無明長遵正本臥處寶宮坐甘香積帝釋淵廣  
泛般若之舟淨居深沈駕牛車之美澤及三界明照四  
天大悲拔苦事炳前經弘慈與樂義高名訓是以靈權

降迹出沒不同菩薩位懷顯晦多術無邊劇惱扇八苦  
於修途有縛纏情繞六趣於危道金鎖玉牀猶念解脫  
雕珠飾綺不及塗中至如飄飊熱風滄浪冰水暗室千  
重黑城百仞鐵輪碎骨銅柱焦腸傷出刀鋒橫抽劍鏑  
如斯衆苦尤為險脆一息不追則萬劫永別刹那暫斷  
則千代長離相與共託閻浮泡生幻處危脆之質有險  
蜉蝣風電之馳誠難可駐況復三相併蹙二鼠攢危毒  
箭惡虵尤為可畏庶憑正法拔茲累染長享百福永斷

六塵對至無彊唯佛可恃今為六道四生三途八難慈  
悲懇倒一心徧禮十住菩薩三行聲聞禮救世觀音獻  
蓋寶積西方大勢東國妙音四辯淨名二土螺髻珠頂  
善宿彌勒文殊金剛藏解脫月棄陰蓋常舉手十大弟  
子五百羅漢願囹圄空虛疾惱消息城中百縣方外千  
城凡在幽執一同寬蕩人協覆蛇俗化匡蟻類服鳩之  
不死同拔劍之無傷舍生不縷轉死自溫渭橋日飽翳  
桑無餓打塞三塗填碎地獄破魔兵衆壞生死軍閻羅

發十善之心牛傍啓五戒之業如魚少水若鴈窮林一聽法音即捨穢質人運五體歸命三寶

四月八日度人出家願文

弟子蕭綱以今日建齋設會功德因緣歸依十方盡虛空界一切諸佛歸依十方盡虛空界一切尊法歸依十方盡虛空界一切聖僧竊聞涅槃經言身如畫水隨畫隨合是身不淨九孔常流凡夫愚人常行味著愚癡羅刹止住其中又如瑞應經言沙門之為道也捨家妻子

捐棄愛欲斷絕六情守戒無為其清淨得一心者則萬  
邪滅矣一心之道謂之羅漢聲色不能染榮位不能屈  
難動如地以免憂苦故知出恩愛獄薄俗為難善來比  
丘其福深重弟子以此因緣今日度人出家願一切六  
道四生常離愛欲永拔無明根削遣闇惑心修習般若  
慧足踐輕輪之光口說懸珠之辯披忍辱鎧秉智慧刀  
乘菩薩車坐如來座結纏披解頂相光明戒因清白後  
報尊重所有果業皆悉勝出受持法藏為佛真子一切

道行皆悉能行一切大誓不休不息仰願十方盡虛空  
界一切諸佛仰願十方盡虛空界一切尊法仰願十方  
盡虛空界一切聖僧咸加證明又仰願十方盡虛空界  
一切諸天仰願十方盡虛空界一切諸仙仰願十方盡  
虛空界一切聰明正直守護一切善神又願今日見前  
幽顯大衆咸加證明今日誓願使弟子蕭綱得如所願  
滿菩提願一切衆生皆悉隨從得如所願

千佛願文

蓋聞九土區分四民殊俗昏波易染慧業難基故法身  
寂鏡有照斯感滌無明於欲海度蒼生於寶船或輕慈  
導捨薄笑牽悲曲豔口宣斜光頂入自鹿樹表光金河  
匿曜故像法衆生希向有形雖千聖異跡一智同塗弟  
子某甲久沒迷波長流苦沫不生意樹未啓心燈而蓋  
生一念敬造千佛雖復無上無為極相難辨非空非有  
妙智難觀而紺髮日光蓮眸月面庶可長表誠敬永寄

心期

祭文

祭灰人文

積注奄旬祭在灰人消茲獸炭焚此桂薪積如玉屑聚  
若遊塵庶人之風不拂獄吏之慢寧陳當令金光小史  
侍使玉童奏雲師於執法力水伯於天宮鑽星誅於電  
女貫索囚於雷公廓重氛於八極靜連絲於四空既瞳  
瞳於車蓋又赫赫於飛盤且疑威於趙盾實望近於長  
安

祭戰亡者文

降夫既旋功臣又賞班荷元勲蘇逢漏網校尉霑榮屬  
國蒙獎獨念斷魂長畢灰壤膏原染刃委骨埋泉徒聞  
身沒詎辨名傳

疏

為諸寺檀越願疏

菩薩戒弟子蕭綱歸依十方盡虛空界一切諸佛歸依  
十方盡虛空界一切尊法歸依十方盡虛空界一切聖

僧積習長夜輪轉覆灰末劫易危煩流難拯不樹兩門  
豈脩二翼常恐虛蕉染惑永結駛河愛藤懸網長垂苦  
岸敢承三寶覺悟之力於幽顯前發弘誓願今願為武  
當山大平寺并此鎮望楚白塔同安習善延明頭陀上  
鳳林下鳳林廣嚴等寺皆盡形壽永為檀越雖七寶四  
事多謝往賢一念片言庶符般若方類不滅之燈終非  
起烟之蜜以此功德仰福皇帝春宮家國內外咸同此  
善乃至天龍八部六道四生普皆蒙福

為人造丈八夾紵金薄像疏

竊以慧日潛影慈輪罷應業逐惱飄愛隨情熾徒愍衣  
珠抱名珍而弗悟眇歎葉金惑空言而啼止自非表茲  
勝業樹彼妙緣何以去此心堂移茲身窟故水精龍塔  
永愴恨於遺髦明鏡石龕獨徘徊於留影某甲久發誓  
願徧為六道四生造夾紵丈八佛像一軀年月已流因  
緣易奪常恐暫有之身忽隨畫水還無之報颺爾電光  
今便建立誠心遂茲本誓使聚月見容金山表跡見形

善發聞名惡捨拔六根之痛惱去五燒之焚灼但四寶  
屢空七財多匱仰雙蓮而獨慨覩萬字而無由儻能薄  
離五家微捐四事結此冥慈共成因果則素氈之功非  
唯昔世散華之報方驗來緣語善無奢在言多慙謹疏  
為人作造寺疏

竊以布金須達表精舍於給園影石仙人造伽藍於離  
越莫不事表區中心憑真外但四纏惑惱去善源而無  
滌五濁重疊非慧刃而安揮故以愍彼濕薪傷茲滴器

今於郢州某山為十方僧建立招提寺紫負郊原面帶  
城雉枕倚巖壑吐納煙雲重門洞啓未創飛行之殿步  
閣中雷猶寡密石之功巖飾之理難階瓶鉢之資已罄  
道俗儻能微留善念薄獎勝緣則事等觀香義同錫乘  
昔人脩檀手雨七寶前賢薄施掌出雙金福有冥移言  
無多遜謹疏

漢魏六朝百三家集卷八十二下



總校官庶吉士 臣侍 朝

校對官編修 臣楊壽楠

謄錄監生 臣莫 漢